

## 100 Jahr Kambly Jubiläum

Liebi Ursula, liebe Oskar

Wärti Frou Käser, wärte Herr Regierungsrat Käser

Liebi Mitarbeiter, liebi Schächeler

Mit däm Fescht fyret z'Kambly-Ungernähme z'100 jährige Jubiläum. Syt 100 Jahr oder andersch gseit syt 3 Generatione, steit Kambly für Stabilität, Ideerichtum, Verlässlichkeit, Gloubwürdigkeit u Einmaligkeit. Anstatt Renditeoptimierig uf Choschte vor Qualität, entstöh Ämmitaler Spezialitäre mit Mähu us der Dorf mühli u Anke us der Dorfchäsi. D'Kambly isch eini vo de gröschte Arbeitgäbere ir Region. Nöiboute, Renovations u Sanierige wärde mit Yibezug vom Dorfgwärb realisiert. Dür das entsteit e grossi Wärterschöpfig für üsi Gmein.

Lokau verankeret u globau handlend. So wird z'Ämmitau mit syne Fähigkeite u Spezialitäre i die ganzi Wäut use treit. Der Fabriglade u jizte z'Kambly-Erläbnis sy u wärde Aaziehungspunkt für Lüt vo nach u fern. Sie beläbe z'ganze Wirtschafts- u Kulturläbe vo üsem Dorf. Dür d'BLS u mit em Kambly-Zug wird der öffentlech Verchehr gförderet u so wärde o üsi Bahnaschlüss gfeschtiget.

Der Oskar Kambly isch, wie o sy Vater synerzyt, Presidant vom Kulturverein u e tragendi Chraft by üsere grosse

Kunschtusstellig. D'Ungernähmerfamilie Kambly treit auso vo ganz Unger ganzheitlech u mit Verantwortig, Begeischerig u Liebi das 100 jährige Ungernähme u üses Dorf. Das sy Goudtugende u Qualitäte wo me i üser Wäut viu z'weni aatrifft. Aber grad sie fülle üsi Schatztrueh viufäutig u nachhautig. Der Gmeinrat het aus Jubiläumsgschänk es Goudvreneli vo 1910 usgsuecht. Z'Goudvreneli u z'Kambly-Brätzeli sy urschwyzerschi Ächttheitsymbol u krisebeschtändig. Es sy Lieblingsgschänk u i jedem Schwyzer Huushaut aa z'träffe. 1910 hie z'Kambly-Ungernähme z'gründe u i der Foug o hie z'bliibe, isch goudrichtig gsi. Der Gemeindrat gratuliert u dankt Öich, Ursula u Oskar u aune Mitarbeiter im Name vo der ganze Gemeind hätzlech u mit Hochchtig für das grosse Wärk u für das schöne Fescht hüt.

Mir wünsche üs aune no mängs chnuschperigs u chüschtigs Jahr.

Danke

20. März 2010

Michel Seiler, Gemeinspresidänt